

կայ տունը: Յիշեալ գումարը կոչուում է հաղէմնաւի, որ արաբերէն նշանակում է այս ասել, համաձայնել: Պէտք է յիշել, որ պատգամները տղի տունը մանելիս ամեն անգամ հիւրասիրւում են, իսկ աղջկայ տանը մինչև հաղէմասին տալը ոչ մի բանով չեն հիւրասիրւում: Աղջկայ հայրը կանչում է իւր ազգականներից մի քանիսին և պատգամների հետ նստում օդան: Պատգամները խնդրում են աղջկայ հօրը որոշել, թէ ինչ պիտի առնէ տղի հօրից աղջիկը տալու համար: Սա հրաժարւում է, ասելով՝ թէ աղջիկը իմս չէ, այս ինչինն է, թող նա ասի: Սա էլ, նախապէս իմանալով աղջկայ հօր միտքը, սկսում է բարձրից բռնել: Պատգամները սկսում են սակարկել և կանգ են առնում գլխաւորապէս վճարելիք փողի վրայ, որ տատանւում է 30—220 միջև: Որչափ տղան սիրահարուած և աղքատ լինի, այնքան հաղէմասին բարձր կըլինի. այդ է պատճառը, որ աղքատ երիտասարդը ստիպուած է լինում կամ պարտքի տակ ընկնել, կամ փախցնել աղջկան: Երկար սակարկութիւններից յետոյ, որ երբեմն մի քանի օր է տևում, փոխադարձ զիջողութիւններով վերջապէս համաձայնութիւն են կայացնում, և պատգամները վճարում են իսկոյն դրամը աղջկայ հօրը ¹⁾:

Ախալցխայի գաւառումն էլ գոյութիւն ունի գնմամբ ամուսնութիւնը: Այն գումարը, որ վճարւում է փեսայի կողմից, յայտնի է գլխաւորին կամ թրքերէն ըսելը անուններով: Գլխաւորն հատուցանում են հարսնացուի ծնողներին, երբ վերջինները գալիս են այցելութեան փեսացուի տունը և յայտարարում վերջնականապէս, թէ յօժար են իրենց աղջկայ ամուսնութեանը ²⁾: Նոյն տեղը սովորութիւն կայ, որ նորափեսան հարսանիքից առաջ քաւորի ու մի քանի մակարների առաջնորդութեամբ անձամբ գնում է բարեկամներին ու ծանօթներին հարսանիքի հրաւիրելու:

¹⁾ Ե. Կալայեան—Չաւախք, Ա. հր. 124.

²⁾ Свадебные обычаи ахалцыхских армян—Этнографическ. Обозр. 1889 г. № 1.